

Meanan Mará

Mi ta djòg pa mantené mi kurpa den kondishon. Mi ruta diario ta hibámi banda di un trankera largu. Un dia mi a ripará na e trankera dos mea mará banda di otro na un haltura di kisas 130 sèntimeter. Nan koló skur tabata identiko; ma siendo tur na tera mi no a mira e koló original. E dos konópi tabata simpel ma mará duru.

Mi no a paga tino na e meanan ora mi a pasa. Mi solamente a ripará ku e meanan tabata mará ei, loke no tabata e kaso e biaha anterior ku mi a pasa.

Ma despues mi a kuminsá pensa tokante e meanan. Biaha pasá ku mi ruta a hibámi banda di e trankera ei, e meanan no tabat'ei. Kon biní e meanan a keda mará di e forma ei?

Mi por a yega na konklushon ku ta pa kasualidat ku e meanan ta mará 10 sèntimeter for di otro na trankera. Di un òf otro manera, un mea lo a bula den bientu pa tantu tempu te ku punta di e mea a lora rònt di e waya i forma un konópi. I esaki a sosodé ku tur dos mea apart. Debí ku mi no a mira un hende mara e dos mea banda di otro na trankera, mi por dedusí ku el a sosodé pa kasualidat.

Ma ningun hende ku sano huisio lo konkluí ku esei ta loke a sosodé. Maske mi no a mir'é sosodé, mi konklushon inmediato i lógiko ta ku un hende mester a mara e meanan na e haltura ei. Ningun mea bulando den bientu lo keda mará duru na trankera. Anto pa presis e mésun kos sosodé ku e di dos mea, ku e ta keda mará nèt banda di e otro ta algu ku ningun hende lo kere. Kualke persona ku dos plaka di sintí lo rasoná ku un ser inteligente a mara e meanan na trankera.

Tur dia kada un di nos ta hasi e mésun dedukshon. Ningun hende ku ta kana kantú di laman i ta mira skirbí den santu “Pedro ta stima Linchi” lo konkluí ku olanan di laman a hasi esei. Ta ilógiko pa dedusí ku un papel bentá na suela doblá den forma di avion ta produkto di bientu. Ora bo ta mira “Was me” skirbí riba bentana sushi di outo, bo no ta kere ku un barbulèt a skirbi e lèternan. Ta un hende kèns so ku lo pensa ku e kachó mes a pone e banchi rònt di su garganta.

Nos tur ta konkluí den kasonan insignifikante asina ku **nan no por a sosodé pa kasualidat! Kada un ta muestra dede den direkshon di un ser inteligente.** Inteligencia ta nesesario pa mara mea na trankera. Inteligencia ta nesesario pa skirbi lèternan i forma palabra. Inteligencia ta nesesario pa dobla papel siertu manera pa forma un avion. Asta inteligencia ta nesesario pa mara banchi di kachó.

Si inteligencia ta nesesario pa hasi kos asina chikitu—loke tur hende ta di akuerdo—anto **nos mester konkluí lógikamente ku inteligencia ta nesesario pa hasi kos muchu mas kompliká.** Mester ta un Ser inteligente ku a forma pia di hende ku múskulo mas fuerte pa karga peso di e kurpa i pa kana. (Kòrda ku hende mester a kana riba man ku múskulo ménos fuerte den brasanan.) Mester ta un Ser inteligente ku a pone solo 147 mion te 152 mion kilometer for di mundu. (Si mundu tabata mas serka solo, hende lo no por sobreviví riba un tera “hasá”. Si mundu tabata mas leu for di solo, hende lo no por sobreviví den un klima tan friu.) Mester ta un Ser inteligente ku ta pone awa kai fo'i haltura di nubianan den gotanan tan chikitu i tòg kai tan suave ku e no ta hasi daño na hende, bestia, òf mata. Mester ta un Ser inteligente ku ta pone palu produsí fruta, wowo mira, blenchi bula keda na un lugá (manera helikòpter), piská saka oksígeno for di awa, èts.

Maske ningun di nos tabata presente, **ta totalmente ilógiko pa kere ku e kosnan aki**—i miones di otro kos—**por a sosodé pa kasualidat** manera evolushonistanan ta bisa. Ta lógiko pa nos simpelmente aseptá loke Beibel ta bisa: “*Na prinsipio Dios a krea e shelunan i tera*” (Génesis 1:1).